

## **MIŠLJENJE**

po zahtjevu privrednog subjekta „Nestro Petrol“ a.d. Kralja Alfonsa XIII br.9, 78000 Banja Luka

Sarajevo, januar 2023. godine



Broj: 01-26-7-13-4/22  
Sarajevo, 26.1.2023. godine

Konkurencijsko vijeće Bosne i Hercegovine, na osnovu člana 25.stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu privrednog subjekta „Nestro Petrol“ a.d. Kralja Alfonsa XIII br.9, 78000 Banja Luka, od 2.6.2022. godini, na 114. sjednici održanoj dana 26.1.2023. godine, donijelo je

### **MIŠLJENJE**

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 2.6.2022. godine pod brojem: 01-26-7-13-1/22 zaprimilo Zahtjev za davanje mišljenja privrednog subjekta „Nestro Petrol“ a.d. Kralja Alfonsa XIII br.9, 78000 Banja Luka (u daljem tekstu: Podnosilac zahtjeva ili „Nestro Petrol“), u vezi sa obavezom prijave koncentracije u smislu člana 12. te člana 4. Zakona o konkurenciji („Službeni glasnik BiH“, br. 48/05, 76/07 i 80/09).

Dokaz o uplati administrativne takse u skladu s Odlukom o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06, 18/11 i 75/18), Konkurencijskom vijeću dostavljen je pod brojem: 01-26-7-013-3/22 dana 6.12.2022.godine.

Podnosilac zahtjeva u istom navodi da je „Nestro Petrol“ privredni subjekt čija je osnovna djelatnost maloprodaja naftom i naftnim derivatima isključivo na tržištu Bosne i Hercegovine, gdje maloprodajnu mrežu čini 86 benzinskih stanica.

Podnosilac zahtjeva, kao kupac, ima namjeru zaključiti ugovor o kupovini nekretnina sa fizičkim licem lica <sup>1</sup>(..)\*\*, kao prodavcem i privrednim subjektom PETROL-P d.o.o. Bihać, također u svojstvu prodavca, koji posluju na teritoriji Federacije Bosne i Hercegovine. Predmet ugovora će biti kupovina benzinske stanice, vlasništvo (..)\*\*, koja se nalazi u naselju Ostrožac na Uni i kupovina benzinske stanice vlasništvo „PETROL-P“ d.o.o. Bihać, na adresi Zaobilaznica bb, Bihać. Prodavci su vlasnici samo ove dvije benzinske stanice, koje su predmet kupoprodaje, s tim da „PETROL-P“ obavlja djelatnost na obje benzinske stanice.

Podnosilac zahtjeva navodi, da kupovina ove dvije benzinske stanice neće imati uticaja na značajno povećanje tržišnog učešća „Nestro Petrola“ na tržištu u Bosni i Hercegovini, odnosno da neće doći do negativnih efekata na isto, u smislu sprječavanja, narušavanja ili ograničavanja tržišne konkurencije.

Svojim zahtjevom Podnosilac traži od Konkurencijskog vijeća mišljenja da li bi se gore opisani ugovor mogao smatrati zabranjenim u smislu člana 4. stav (1) Zakona o konkurenciji, te mišljenje da li za zaključenje ovog ugovora moraju dobiti saglasnost Konkurencijskog vijeća za odobrenje koncentracije u smislu člana 12. Zakona o konkurenciji.

Postupajući po podnesenom Zahtjevu, Konkurencijsko vijeće ističe da se koncentracijom, u skladu s članom 12. stav (1) Zakona o konkurenciji smatra:

- a) spajanje ili pripajanje nezavisnih privrednih subjekata ili dijelova privrednih subjekata,
- b) sticanje kontrole ili dominantnog uticaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekata, odnosno dijelovima drugih privrednih subjekata i to:

---

<sup>1</sup>(..)\*\* podatak predstavlja poslovnu tajnu

- 1) sticanjem kupovinom većine dionica ili udjela osnovnog kapitala; ili
- 2) sticanjem većine prava glasa; ili
- 3) na drugi način, u skladu sa odredbama zakona koji reguliše osnivanje privrednih subjekata i njihovo upravljanje;

c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.

U smislu člana 12. stav (2) Zakona, sticanje kontrole se ostvaruje putem prava, zaključivanjem sporazuma ili drugim sredstvima kojima jedan ili više privrednih subjekata, bilo posebno, bilo zajednički, uzimajući u obzir sve pravne i činjenične okolnosti, stiču mogućnost ostvarivanja dominantnog uticaja nad jednim ili više privrednih subjekata.

U skladu sa članom 2. stav (1) pod b) Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10), privredni subjekti učesnici koncentracije, koji imaju sjedište i prebivalište u Bosni i Hercegovini, su dužni istu prijaviti Konkurencijskom vijeću ukoliko su ispunjeni uslovi iz člana 14. stav (1) tačka b) Zakona.

Obaveza prijave koncentracije privrednih subjekata, u smislu člana 14. stav (1) tačke b) Zakona, postoji ako ukupni godišnji prihod svakog od najmanje dva privredna subjekta učesnika koncentracije ostvarena prodajom roba i/ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Relevantno tržište, pri tome, određuje se za svaki slučaj posebno, i to kao tržište određenih proizvoda koji su predmetom obavljanja djelatnosti privrednih subjekata na određenom geografskom području.

Dakle, ukoliko su ispunjeni uslovi iz čl. 12. i 14. Zakona, Podnosilac zahtjeva, u skladu sa članom 16. stav (1) Zakona, je dužan Konkurencijskom vijeću prijaviti koncentraciju, u roku od 15 dana od dana zaključivanja ugovora.

Nadalje, Zakon o konkurenciji članom 4. propisuje pojam zabranjenih sporazuma/ugovora, gdje se zabranjenim smatraju oni sporazumi, koji za cilj i posljedicu imaju sprječavanje, ograničavanje ili narušavanje tržišne konkurencije na relevantnom tržištu, a koji se odnose na:

- a) direktno ili indirektno utvrđivanje kupovnih i prodajnih cijena ili bilo kojih drugih trgovačkih uslova;
- b) ograničavanje i kontrola proizvodnje, tržišta, tehničkog razvoja i ulaganja;
- c) podjelu tržišta ili izvora snabdjevanja;
- d) primjenu različitih uslova za identične transakcije sa drugim privrednim subjektima;
- e) uslovljavanje druge strane da prihvati dodatne obaveze koje po svojoj prirodi nisu u vezi sa predmetom sporazuma.

Konkurencijsko vijeće naglašava da se eventualna postojanja zabranjenih konkurencijskih djelovanja utvrđuju u postupcima koji se vode pred Konkurencijskim vijećem, na koji način je jedino i moguće utvrditi povredu Zakona o konkurenciji, te se mišljenjem ne može dati ocjena o postojanju istih.

Odnosno, podneseni zahtjev za mišljenje u vezi s pitanjem da li bi se zaključeni kupoprodajni ugovor o kupovini dvije benzinske stanice moga smatrati zabranjenim, ne može se razmatrati u smislu odredbe 25. stav (1) pod f) Zakona o konkurenciji.

Konkurencijsko vijeće, slijedom navedenog, daje ovo mišljenje isključivo na osnovu podataka navedenih u Zahtjevu, te ukoliko dati podaci odstupaju od stvarnog činjeničnog stanja ovo mišljenje se ne može primijeniti.

**Predsjednik**

Nebojša Popić